

**Uunga siunnersuut: Sanaartornermi neqerooruteqartitsisarneq pillugu Inatsisartut inatsisaata allanngortinneqarnissaa pillugu Inatsisartut inatsisaat nr. xx, xx. xxx 2020-meersaq**

**(Aningaasanut killigititassanik iluarsineq, atuuffinnik erseqqissaaneq, siumoortumik neqerooruteqartitsinani aamma isumaqatigiiffiusumik neqerooruteqartitsinani suliariumannittussarsiuussisarnissamik piumasaqaatit pillugit aalajangersakkat, siumoortumik nalunaaruteqartarnissamik atuutsitsilerneq kiisalu Neqerooruteqartitsisarnermut Maalaaruteqartarfik pillugu aalajangersakkanik atorunnaarsitsineq)**

(Ineqarnermut Attaveqaqatigiinnermullu Naalakkersuisoq)

**Saqqummiussinermut allakkiaq**

(Ineqarnermut Attaveqaqatigiinnermullu Naalakkersuisoq)

**Siullermeerneqarnera**

Sanaartornermi neqerooruteqartitsisarneq pillugu Inatsisartut inatsisaata (naatumik oqaatigalugu neqerooruteqartarnermut inatsisip) allanngortinneqarnissaanik siunnersuut, Naalakkersuisut matumuuna saqqummiuppaat.

Neqerooruteqartitsisarnerit eqaannerulersikkumallugit akikinnerulersikkumallugillu, neqerooruteqartarnermut inatsit ataasiakkaatigut allanngortinneqassasoq siunnersuutigineqarpoq.

Sanaartornermi pissutsinut allanngoriartortunut naapertuuttumik neqerooruteqartarnermut inatsisip naleqqussarnissaa, siunnersuutitigut qulakkeerneqassaaq. Sumiiffippaalunni unammilleqatigiinneq annertuumik allanngorsimavoq. Tamatumunnga patsisaasut assigiinngillat, sumiiffippaalunnili malunnaatilimmik mesterit suliffeqarfiillu annertuumik ikilisisimapput.

Pilersaarutaasumik sanaartugassamik neqerooruteqartitsisussap siumut nalunaaruteqarsinnaalernissaa, siunnersuutitigut periarfissanngussaaq. Taamaalilluni sumiiffinni unammilleqatigiittoqarpallaarsinnaanngiffioreersuni, ajornannginnerusumik neqerooruteqartitsisoqarsinnaalissaaq.

Taamaalilluni suliassap nalinginnaasumik ammasumik saqqummiunneqartarnissaanik neqerooruteqartarnermut inatsisip piumasaqaataanik, siumut nalunaaruteqarnissaaq naammassinnissaaq. Naammattumik unammilleqatigiittoqarnissaa, neqerooruteqartitsinermilu allaffissornerup eqaallisarneqarnissaa, taamaalillunilu aningaasartuutit annikillisinneqarnissaat pisuni tamani siunertaavoq.

Tamatuma saniatigut qanoq ilinerani siumoortumik neqerooruteqartitsisoqarnissaanut aningaasanut killigititaasut 500.000 koruuninit, 1.500.000 koruuninut qaffanneqassasut siunnersuutigineqarpoq.

Suliassat akiligassanngortinneqartussat aningaasartaasa killinga, 300.000 koruuninit 500.000 koruuninut qaffanneqassasoq siunnersuutigineqarpoq. Taamaalilluni suliassanut, katillugit annerpaamik 500.000 koruuninut nalilinnut neqerooruteqartitsinissaq pisussaaffiussanngilaq.

Kiisalu sanaartornermi suliariumannittussarsiuussinerit pillugit maalaarutit, Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaat naapertorlugu siunissami suliarineqartalissasut siunnersuutigineqarpoq. Erseqqissaatigineqassaaq, maalaaruteqarsinnaaneq allanngortinneqanngimmat.

Taamatut oqaaseqaateqarlunga, siunnersuutip suliarineqarnissaa Naalakkersuisut sinnerlugit Inatsisartunut ingerlateqqippara.